

Demussà spiert innovativ

L'agricultura grischuna tschertga la neutralità climatica

DAD ANDREAS CADONAU/FMR

■ **L'agricultura grischuna tschertga la neutralità climatica a partir da l'onn 2031. Divers partenaris han lantschà da cuminanza cun il chantun Grischun in scenari per producir victualias senza engrevgiar il clima cun emissions da gas carbonic. L'interess da la vart da l'agricultura da sa participar è avant maun.**

Per plaschair han puras e puras procurà tar il schef da l'uffizi d'agricultura e geoinformaziun *Daniel Buschauer*. Suenter las emprimas infurmaziuns publicas dal project per in'agricultura climatica neutrala l'entschatta november 2019, èn prest 100 manaschis s'annunziads per sa participar al project. Quella prontadad da far in pass en l'avegnir demussia in spiert innovativ da l'agricultura grischuna, ha explitgà Buschauer. Quai saja impurtant perquai che l'agricultura servia mumentan en Svizra in pau sco asen bastunà per divers problems discutads da la societad. La prontadad demussada da l'agricultura grischuna da betg star salda suenter avair fatg in pass en la produziun ecologica saja er impurtant vers la publicità, ha ditg Buschauer. Il schef da l'uffizi d'agricultura e geoinformaziun è conscient che las finamiras dal project per in'agricultura grischuna climaticamain neutrala èn detg sportivas. Sminuir las emissions da CO₂ da l'agricultura grischuna per 50 procent enten impedir, reducir e cumpensar las emissions. Reducir ils custs da manaschi cun augmentar l'effizienz ed ils respargns. E recaltgar dapli entradas cun vender products e servetschs climaticamain neutrals. La visiun è vegnida lan-



L'agricultura na patescha betg sulet da las irregularitads pli severas dal clima. Ella contribuescha medemamain a las emissions dal gas carbonic. Ed è pronta da sa fatschentar cun remadura.

FOTO N. SIMMEN

tschada da diversas organisaziuns agraras grischunas e stat sut il patronadi dal chantun Grischun.

Buschauer ha fatg attent ch'il project sustegni dal chantun vegnia ad esser part dal «green deal» sancziunà dal Cussegl grond. Il cusseglier guvernativ *Mar-*

cus Caduff ha ditg dacurt a chaschun da la radunanza da Bio Grischun a Landquart ch'i na saja insumma nagina dumonda sch'ils pajaments directs sbursads dal maun public vegnian in di colliads cun pretender mesiras a favur dal clima, mabain cura che quai succedia.

Ed il Grischun vul esser pront. Buschauer ha discurrì dad in agir proactiv en chausa che saja da beneventar e meglier che sulet stuair reagir visavi a realitads decretadas.

Gia rimnà experienzas

Sco mainaprojet è vegnì tschernì *Gianluca Giuliani* che posseda gia intginas experienzas cun ina sumeglianta finamira stipulada dad in tozzel manaschis purils tranter Schaffusa e Turitg. Dapi diesch onns accumpogna Giuliani quel project, e la visiun Agricultura grischuna clima neutral è concepida per il medem spazi da temp. Sco quai che Giuliani è s'exprimi vers il «Pur Grischun» sa chatta la gruppa da project en la fasa da sclerir quant relevant ord vista climatica che l'agricultura lavura ozendi.

Durant la stad proxima vul la gruppa preschentar emprimas enconuschientschas. Per alura far la tscherna per 40 en fin 50 manaschis che duain applitgar e sviluppar las propostas per in'agricultura clima neutrala. A partir da l'onn 2026 vulan ils promoturs dal project extender lur enconuschientschas sin l'entir'agricultura grischuna. In'agricultura che na patescha betg sulet da midadas climaticas, mabain contribuescha era latiers.

Tenor las indicaziuns da l'Uffizi federal d'agricultura derivan 16 procent da las emissions cun gas d'effect da serra da l'agricultura svizra. E la gronda cumpart da quellas emissions, bunamain la mesadad, dals animals da niz tegnids sin ils manaschis svizzers. Segiramain detg interessant dad endriescher las pussaivladads eruidas dal project per reducir las emissions dals manaschis purils.